

AZKOITIA-KO EUSKAL JAI-ALDIAK

EUSKAL-ITZ-JOSTALDIEN EGINTZA

Euskal-itz-jostaldien Batzarrea dator gaur Azkoiti-ra, kontu ematera leku ontan arkitzen diran entzule guztiai, zer nolakoa dan aurreten, izkribatzalle, musikolari eta pintatzalleen indar-neurtzeetan, batzar epalle bereziak erabaki duten sari emaldia.

Arreta aundiz ikusi ondorean aurkestu diran moldaera guziak, batzarreak erabaki du era ontan:

Izkribatzalleen artian irabazi du saria Lerchundi ta Baztarrika-tar Juan Manuel, Kalasan-darretako aba jaunak, «Polli eta Pello» izendatutako bi euskaldun bikaiñ ta zintzoen kondaira eder, euskera garbi, jator eta apañian idatzitako lan gain gañekoagatik.

Beste saria irabazi du Abelino Barriola jaunak «¡Aldiz, aldiz!.....» izentzat duben jostirudi, ederki asmatua, obetuago antolatua eta farra-garrizko gertaeraz josia dagonagatik.

Irabazi ditu bi sari Bitoriano Iraola jaunak, bi eresi berdin-gabekoa gatik; bata deitzen da «¡Ama!» eta bestia «Jose Franzizko Aizkibel jakintzuari».

Irabazi dituzte *aldearak*: Mujika-ko Gregorio, Ramon Inzagaray (apaiza), eta Ramon Gelbenzu jaunak, «Azkoitiar ospetsuak», «Kulubis» eta «¡Gajua!» izentzat dituzten lan egokiagatik.

Aipamen onragarriak irabazi dituzte Bitoriano Iraola, Jose Inazio Garmendia eta Juan Inazio Uranga jaunak, eta Dolores Elizondo andreak; «Elurtea», «Gure pamilin izaera», «Franzizko Aizkibel jauna» eta «Maiñuari» izendatuagatik.

Musikalarien artian saritubak izan dira Juan Franco Ribate, Anjel Telleria, Luis Urteaga, Sekundino Esnaola eta Balentin Larrea jaunak; «Euskal-erriko kantak», «Portaletik Olaberrirano», «Urre zarren billa

datoz chistulariak», «Euskal basoko kantariyak» eta «Sorterri» izendatutako euskal moldaera gain-gaṇekoagatik.

Aipamen onragarriak irabazi dituzte Jose Maria Ajesto eta Alta Donosti-ko Jose Antonio jaunak; »Erromeri aldetik» eta «Barbotegi» izendatuagatik.

Pintatzalleen artian, lan batzuek biar bezela aurkestu ez diralako batzarreak, ondo damu dubela, eziṇ saritu izan ditu.

Beste gaṇerakoen artian eman zayo lenengo saria Luis Armengou jaunari, «Arto zuriketan» izendatutako lana gatik eta bigarrena Anjel Kabanasko jaunari «Amena» izentzat dubena gatik.

Antzetzalarien artian saria erdibitu da Urkabe eta Gregorio Gonzalez Galarza jaunen artian; antzeztak jator eta egokiak «Oarso» eta «Nere erritarrak» azalkaitzat dituztela aurkestu dituztenagatik. = Azkoitia 1910.^{ko} Agorrillaren 3^{an}, = *Alfredo Laffitte eta Obineta* batzar buruba. — *Toribio Alzaga*, goarpelaria.
